



UNIVERSITÄTS-
BIBLIOTHEK
PADERBORN

Universitätsbibliothek Paderborn

Concilia Galliæ Narbonensis

Baluze, Etienne

Parisiis, 1668

XL. Litteræ Guillelmi de Lauduno Archiepiscopi Tolosani, quibus potestatem facit Presbyteris Collegij Narbonensis apud Tolosam fundati audiendi confessiones scholasticorum ejusdem Collegij, eisque ...

urn:nbn:de:hbz:466:1-14646

X L.

Litteræ Guillelmi de Lauduno Archiepiscopi Tolosani, quibus potestatem facit Presbyteris Collegij Narbonensis apud Tolosam fundati audiendi confessiones scholasticorum ejusdem Collegij, eisque administrandi sacramenta ecclesiastica.

Ex archivo Collegij S. Martialis Tolosæ.

FRATER Guillelmus miseratione divina Archiepiscopus Tolosanus universis præsentis litteras inspecturis salutem in Domino sempiternam. Dudum Reverendus in Christo Pater Dominus Galbertus Dei gratia olim Arelatensis nunc Narbonensis Archiepiscopus, pia consideratione motus, domum quandam diversas continens mansiones, cum suis viridariis, quam Tolosæ in carreria de Balatis acquiri & emi fecerat ad usum & sustentationem duodecim pauperum scholarium ibidem institutorum, constituit ac etiam deputavit, quòdque in domo eadem Capellam unam perpetuam ad laudem & honorem divini nominis, ac præcellæ Dei genitricis Mariæ semper virginis, beatorum Apostolorum Petri & Pauli, & sancti Trophimi dictæ Arelatensis Ecclesiæ patroni, de nostri licentia construxit & fundavit, statuens & ordinans quòd duo ex dictis scholaribus sint Presbyteri pauperes & dociles, qui Missas singulis diebus continuè alternis vicibus pro salute vivorum & requie defunctorum celebrent in Capella prædicta, ut ipsi Presbyteri & scholares prædicti

dicti Missa non careant ullo die. Verum cum ipse Dominus Archiepiscopus nobis cum instantia supplicaverit quatinus Arnaldo de Vaxeria & Gasberto de Sapriano Presbyteris in dicta domo jam institutis & successoribus eorum ibidem pro tempore instituendis confessiones audiendi necnon licentiam ministrandi dictis scholaribus ecclesiastica sacramenta concedere dignaremur, Nos igitur attendentes tam pium opus per sepedictum Dominum Archiepiscopum Deo fore gratum & acceptum, supplicationi hujusmodi dicti Domini Archiepiscopi favorabiliter annuentes, prefatis Arnaldo & Gasberto Presbyteris in dictis domo & Capella jam institutis & eorum cuilibet & successoribus suis Presbyteris ibidem pro tempore instituendis predictas confessiones audiendi, & eadem sacramenta ministrandi, dictisque scholaribus & eorum servitoribus ea ab ipsis Presbyteris recipiendi auctoritate ordinaria perpetuis temporibus concedimus potestatem. In cuius rei testimonium presentibus litteris sigillum nostrum duximus apponendum. Datum in castro nostro de Balmario die III. mensis Junij, anno Domini millesimo CCCXLV.

Vide Catellum in Memoriis Historia Occitanica pag. 226.

